

- प्रधानमंत्री नरेन्द्र मोदी रो काल नई दिल्ली मांय अंतर्राष्ट्रीय कपड़ा प्रदर्शनी भारत टेक्स मांय सिरकत करण रो कार्यक्रम।
- उपमुख्यमंत्री दिया कुमारी कह्यो-जयपुर मांय आईफा अवार्ड रा कार्यक्रम ऊं प्रदेश रा पर्यटन ने नुवी पिछाण मिलेला।
- लोकसभा अध्यक्ष ओम बिरला प्रयागराज महाकुंभ मांय पवित्र स्नान कीनो-महाकुंभ ने संस्कृति अर आस्था रो केन्द्र बतायो।
- जालौर महोत्सव आज सरू व्ह्यो-भरतपुर स्थापना दिवस रा कार्यक्रमों रा तैत ई लोग श्रमदान कीनो।

000

नई दिल्ली मांय चाल रह्या भारत टेक्स-2025 मांय प्रधानमंत्री नरेन्द्र मोदी रो काल सिरकत करण रो कार्यक्रम है। 14 फरवरी ऊं सरू व्ह्यो ओ कार्यक्रम सत्रह फरवरी तांई चालेला। भारत टेक्स मांय 120 ऊं बत्ता देशों रा नीति बणावण वाळा अर वैश्विक सीईओ, प्रदर्शक अर अंतर्राष्ट्रीय खरीदार सिरकत कर रह्या है।

000

उपमुख्यमंत्री दिया कुमारी कह्यो है के जयपुर मांय आईफा अवार्ड-2025 रा कार्यक्रम ऊं प्रदेश ने सैर-सपाटा रा हलका मांय नुवी पिछाण मिलेला। वे आज जयपुर मांय खबरनवीसां सागे बातचीत कर रही ही। दिया कुमारी कह्यो के ई आयोजन ऊं पारम्परिक हलकां सागे नुवा हलकां मांई ई सैर-सपाटा ने बधावो मिलण री आस है। वे कह्यो के प्रदेश मांय हर साल आईफा री भांत रा मोटा आयोजन कराया जावेला, ज्यां ऊं नौकरी-धंधा रा नुवा मौका बणेला अर सरकार री आमदनी मांय ई बधोतरी व्हेला। ई मौके उपमुख्यमंत्री खबरनवीसां सागे बजट समेत न्यारा-न्यारा मुद्दां माथे चर्चा कीनी।

000

प्रसार भारती रा अध्यक्ष नवनीत कुमार सहगल आज जयपुर दूरदर्शन केंद्र रो दौरा कीनो। वे अहलकारां सागे मीटिंग कर र जयपुर दूरदर्शन ऊं प्रसारित कर्या जावण वाळा कार्यक्रमों री जाणकारी लीनी अर समसामयिक अर जनता रा भला ऊं जुड़्या कार्यक्रमों री तादाद बधावण रा हुकम दीना। श्री सहगल कार्यक्रमों मांय नवाचार करण माथे जोर देता थकां नौजवानां री भागीदारी सागे कार्यक्रम बणावण माथे जोर दीनो। श्री सहगल दूरदर्शन परिसर मांय 'एक पेड़ माँ के नाम' अभियान रा तहत पौधा ई रोप्या। प्रसार भारती रा अध्यक्ष काल जयपुर मांय आकाशवाणी केंद्र रो ई दौरा कीनो हो अर अहलकारां सागे चर्चा कर र कार्यक्रमों ने ओर बेहतर बणावण बाबत जरूरी हुकम दीना हा।

000

कोटा जिला मांय गड़ेपान रा सरकारी स्कूल कने आज एक फैक्ट्री ऊं गैस रिसाव व्हे जावण ऊं स्कूल री केई टाबरियां री तबियत खराब व्हे गयी। जिला प्रशासन अर पुलिस मौके पूग र मांदा बच्चां ने अस्पताल मांय भर्ती कराया। जिला कलेक्टर बतायो के टाबरियां री हालत खतरा ऊं बाहर है अर घटना रा कारणों री जांच करी जा रही है।

-----

ई बीचे लोकसभा अध्यक्ष ओम बिरला अहलकारां ऊं मामला री जाणकारी ले र जरूरी इंतजाम करण रा हुकम दीना।

000

प्रदेश रा विद्यार्थियां ने मुफ्त कोचिंग देवण सारू चलायी जा रही 'मुख्यमंत्री अनुप्रति कोचिंग' योजना रा तैत अर्जी देवण री तारीख बधा र 23 फरवरी कर दीरीजी है। सामाजिक न्याय अर अधिकारिता विभाग ई बारा मांय हुकम जारी कर दीना है। विभाग रा मंत्री अविनाश गहलोत बतायो के उम्मीदवार एसएसओ पोर्टल या एस.जे.एम.एस. एप रे जरिये अर्जियां दे सके है।

000

समाचार महाकुंभ ऊं -

प्रयागराज मांय चाल रह्या महाकुंभ मांय लोकसभा अध्यक्ष ओम बिरला आज पवित्र स्नान कीनो। ई मौके वे महाकुंभ ने संस्कृति अर आस्था रो केन्द्र बताता थकां कह्यो के को करोड़ा लोगां री श्रद्धा रो महाकुंभ है।

केन्द्रीय मंत्री पीयूष गोयल ई आज त्रिवेणी संगम मांय डुबकी लगाई। वे कह्यो के महाकुंभ एक भारत श्रेष्ठ भारत री अनोखी मिसाल है।

ई बीचे, प्रयागराज महाकुंभ मांय आवता दिनां मोटी तादाद मांय जातरूआं रे आवण रा आसार ने ध्यान राखता थकां उत्तर प्रदेश रोड़वेज आवता तीन दिन मांय सवा दो हजार और बसां चलावण रो ऐलाण कीनो है। उत्तर प्रदेश रा परिवहन मंत्री दयाशंकर सिंह अहलकारां ने बसां चलावण अर जातरूआं रो हिफाजत सागे आरामदायक सफर तैय करण रा हुकम दीना है।

000

राज्य री ग्राम पंचायतां मांय एग्रिस्टैक योजना रा तहत किसानां रा नाम माण्ड्या जा रह्या है। ई योजना रा तैत किसानां ने फार्मर आई.डी. डी दी जा रही है, जिण ऊं वां ने खेती बाड़ी ऊं जुड़्या न्यारा-न्यारा सरकारी सुबीतां रो फायदो मिल रह्यो है। झालावाड जिला री गिरधरपुरा ग्राम पंचायत मांय लगायी ज्या शिविर मांय उपखंड अधिकारी अभिषेक चारण किसानां सागे बातचीत कीनी। वे बतायो के तीन दिन रा ई शिविर मांय सात सौ ऊं बत्ता किसानां री फार्मर आई.डी. बणायी ज्यी।

000

जालौर मांय आज जालौर महोत्सव री सरूआत व्ही। तीन दिन रा ई महोत्सव रा तैत लोक नृत्य, लोक गीत अर सांस्कृतिक कार्यक्रम राख्या जा रह्या है। म्हाणा खबरनवीस बतायो के महोत्सव रा पहला दिन शहर रा न्यारा-न्यारा गेला ऊं शोभा यात्रा निकाळी ज्यी।

000

भरतपुर स्थापना दिवस रा तहत राख्या जा रह्या कार्याक्रमां रा तैत आज लक्ष्मण मिंदर मांय भजनां रो कार्यक्रम राख्यी ज्यो। इण मांय ब्रज रा कलाकार भजन गा र मन मोह लीनो। इण ऊं पैली आज संवारे किला रा बांके बिहारी मिंदर परिसर मांय अर किला हलका मांय परिक्रमा रा करीब डोढ़ किलोमीटर गेला मांय झाड़ियां री कटाई कर र आमजन श्रमदान कीनो। रामेश्वरी देवी कन्या महाविद्यालय मांय स्वतंत्रता सेनानियों का देश की आजादी में योगदान मुद्दा माथे संगोष्ठी राख्यी ज्यी।

000

राजस्थान हाई कोर्ट रा जज न्यायमूर्ति मनोज कुमार गर्ग आज भीलवाड़ा जिला अभिभाषक संघ री नुवी चुणी ज्यी कार्यकारिणी ने शपथ दिरायी। ई दौरान बाळपणा मांय ब्याह री रोकथाम रा बारा मांय पोस्टर रो विमोचन ई करी ज्यो। कार्यक्रम मांय राजस्थान हाईकोर्ट रा जज न्यायमूर्ति मुन्नूरी लक्ष्मण अर फरज़न्द अली समेत न्यायायिक सेवा ऊं जुड़्या अहलकार अर वकील मौजूद रह्या।

000

पुलवामा आतंकी हमला मांय शहीद व्ह्या राजसमंद जिला रा बिनोल गांव रा जवान नारायण लाल गुर्जर री मूरत रो आज गृह राज्य मंत्री जवाहर सिंह बेदम अनावरण कीनो। ई मौके बेदम कह्यो के महापुरुषां, शहीदां अर विद्वानां कानी ऊं लिया ज्या संदेशां ने जिन्दगी मांय उतारणा चाहिजे। वे कह्यो के नौजवानां ने भारत ने सांस्कृतिक तौर ऊं ई मज़बूत बणावण रो संकल्प लेवणो चाहिजे। कार्यक्रम मांय विधायक सुरेन्द्र सिंह राठौड़ अर उदय लाल भडाणा समेत जनता रा नुमाइंदा, शहीद रा पिरवार वाळा अर बिनोल गांव रा रेहवासी मौजूद हा।

000

हनुमानगढ़ मांय नशा मुक्ति अभियान रा तहत विद्यार्थियां मांय जाग जगावण सारू आज नुक्कड़ नाटक राख्यी ज्यो। जिला कलेक्टर कानी ऊं बणायी ज्या मानस प्रकोष्ठ री टीम जंक्शन रा महात्मा गांधी सरकारी स्कूल मांय “उजड़ते आशियाने” मुद्दा माथे नाटक खेली ज्यो अर नाटक अर गीतां रे ज़रिए नशा मुक्ति रो संदेश दियो ज्यो।

000

प्रदेश मांय सुबह-शाम हल्की ठंडक रो अहसास बण्योड़ो है, हालांकि 20 ऊं बत्ती ठौड़ां दिन री बगत पारो 30 डिग्री सेल्सियस या ऊंचो दर्ज करी ज्यो। सब ऊं बत्तो 35 दशमलव 6 डिग्री सेल्सियस तापमान बाड़मेर मांय रिकॉर्ड करी ज्यो। राजधानी जयपुर मांय ई दिन री बगत तापमान 29 डिग्री सेल्सियस ऊं बत्तो नापी ज्यो। मौसम विभाग रे मुजब राज्य मांय अधिकतम तापमान सामान्य औसत ऊं 2 ऊं 7 डिग्री सेल्सियस ऊंचो चाल रह्यो है। महकमो आवता 48 घंटां मांय पारो 1 ऊं 3 डिग्री सेल्सियस ताई चढ़बा रा आसार जताया है।

दूजी कानी 18 ऊं 20 फरवरी बीचे पश्चिमी विक्षोभ रा असर ऊं राज्य रा उत्तराद-आतूणी हलकां मांय कठे-कठे बादळा व्हेवण अर बीकानेर अर जयपुर संभाग मांय हल्की बारिश या छांटो-छिड़को व्हेवण रा आसार है।

000